

大乘叢書 D 134

# 百喻經

附選講

大乘精舍印經會 印行

大乘叢書

D134



---

百喻經選講 合刊

---

大乘精舍印經會印行

新學  
PDG

助附印「百喻經附選講」功德徵信錄

新台幣部份：

汶樺股份有限公司（付清餘款）

一、六二〇元：演覺師父

二、〇〇〇元：李五、李光莉、李汶樺、李雨聲、梁志強、陳保源、

張森茂、喻黛妮、聶宏光

人民幣部份：

三、〇〇〇元：霍梅閣

五〇〇元：潘寧馨

五〇元：潘榮壽、潘鳳元

港幣部份：

一〇〇元：李坤、陳錫權

以上共折合台幣一三、〇〇〇元正、共印二、五〇〇本

新學堂

PDG

# 目次

百喻經 / 1

百喻經選講 / 185

百喻經卷第一

尊者僧伽斯那撰

蕭齊天竺三藏求那毘地譯

聞如是。一時佛在王舍城。在鵲封竹園。與諸大比丘菩薩摩訶薩及諸八部三萬六千人俱。是時會中有異學梵志五百人俱。從座而起白佛言。吾聞佛道洪深無能及

者。故來歸問。唯願說之。佛言甚善。問曰。天下爲有爲無。答曰。亦有亦無。梵志曰。如今有者云何言無。如今無者云何言有。答曰。生者言有。死者言無。故說或有或無。問曰。人從何生。答曰。人從穀而生。問曰。五穀從何而生。答曰。五穀從四大火風而生。問曰。四大火風從何而生。答曰。四大火風從空

而生。問曰。空從何生。答曰。從無所有生。問曰。無所有從何生而。答曰。從自然生。問曰。自然從何而生。答曰。從泥洹而生。問曰。泥洹從何而生。佛言。汝今問事何以爾深。泥洹者是不生不死法。問曰。佛泥洹未。答曰。我未泥洹。若未泥洹云何得知泥洹常樂。佛言。我今問汝。天下眾生爲苦爲樂。答曰。

眾生甚苦。佛言。云何名苦。答曰。我見眾生  
死時苦痛難忍。故知死苦。佛言。汝今不死  
亦知死苦。我見十方諸佛不生不死。故知  
泥洹常樂。五百梵志心開意解。求五戒。悟  
須陀洹果。復坐如故。佛言。汝等善聽。今爲  
汝廣說眾喻。

愚人食鹽喻。愚人集牛乳喻。以梨打破頭

喻。婦詐稱死喻。渴見水喻。子死欲停置家中喻。認人爲兄喻。山羌偷官庫喻。歎父德行喻。三重樓喻。婆羅門殺子喻。煮黑石蜜漿喻。說人喜瞋喻。殺商主祀天喻。醫與王女藥令卒長大喻。灌甘蔗喻。債半錢喻。就樓磨刀喻。乘船失釭喻。人說王縱暴喻。婦女欲更求子喻。

(一) 愚人食鹽喻

昔有愚人至於他家。主人與食嫌淡無味。主人聞已更爲益鹽。旣得鹽美。便自念言。所以美者緣有鹽故。少有尙爾。況復多也。愚人無智。便空食鹽。食已口爽。返爲其患。譬彼外道。聞節飲食。可以得道。即便斷食。或經七日。或十五日。徒自困餓。無益於道。

如彼愚人。以鹽美故。而空食之。致令口爽。此亦復爾。

(二)愚人集牛乳喻

昔有愚人。將會賓客。欲集牛乳。以擬供設。而作是念。我今若豫於日日中。穀取牛乳。牛乳漸多。卒無安處。或復酢敗。不如即就牛腹盛之。待臨會時。當頓穀取。作是念已。

便捉犝牛母子。各繫異處。卻後一月。爾乃設會迎置賓客。方牽牛來欲殺取乳。而此牛乳即乾無有。時爲眾賓或瞋或笑。愚人亦爾。欲修布施。方言待我大有之時。然後頓施。未及聚頃。或爲縣官水火盜賊之所侵奪。或卒命終不及時施。彼亦如是。

(三)以梨打破頭喻

昔有愚人頭上無毛。時有一人以梨打頭。乃至二三悉皆傷破。時此愚人默然忍受。不知避去。傍人見已而語之言。何不避去。乃往受打。致使頭破。愚人答言。如彼人者。憍慢恃力。癡無智慧。見我頭上無有髮毛。謂爲是石。以梨打我頭破。乃爾。傍人語言。汝自愚癡。云何名彼以爲癡也。汝若不癡。

爲他所打。乃至頭破。不知逃避。比丘亦爾。不能具修信戒聞慧。但整威儀。以招利養。如彼愚人。被他打頭。不知避去。乃至傷破。反謂他癡。此比丘者。亦復如是。

(四) 婦詐稱死喻

昔有愚人。其婦端正。情甚愛重。婦無直信。後於中間。共他交往。邪姪心盛。欲逐傍夫。

捨離己婿。於是密語一老母言。我去之後。汝可齎一死婦女屍安著屋中。語我夫言。云我已死。老母於後伺其夫主不在之時。以一死屍置其家中。及其夫還。老母語言。汝婦已死。夫即往視。信是己婦。哀哭懊惱。大積薪油燒取其骨。以囊盛之。晝夜懷挾。婦於後時心厭傍夫。便還歸家。語其夫言。

我是汝妻。夫答之言。我婦久死。汝是阿誰  
妄言我婦。乃至二三猶故不信。如彼外道  
聞他邪說。心生惑著。謂爲真實。永不可改。  
雖聞正教。不信受持。

(五) 渴見水喻

過去有人。癡無智慧。極渴須水。見熱時焰  
謂爲是水。即便逐走。至辛頭河。旣至河所

對視不飲。傍人語言。汝患渴逐水。今至水  
所何故不飲。愚人答言。君可飲盡。我當飲  
之。此水極多。俱不可盡。是故不飲。爾時眾  
人聞其此語。皆大嗤笑。譬如外道僻取其  
理。以己不能具持佛戒。遂便不受。致使將  
來無得道分流轉生死。若彼愚人見水不  
飲。爲時所笑。亦復如是。